

Na osnovu člana 39 Statuta KJKP „Vodovod i kanalizacija“ d.o.o. Sarajevo i člana 6. Uredbe o organizovanju službi zaštite i spašavanja i jedinica civilne zaštite specijalizovane namjene Kantona Sarajevo ("Službene novine Kantona Sarajevo", broj 30/13), Uprava preduzeća je na 3. sjednici održanoj dana 13.11.2013. god., donijela

**PRAVILNIK  
O ORGANIZOVANJU I FUNKCIONISANJU  
SLUŽBE ZA VODOSNABDIJEVANJE**

**I – OSNOVNE ODREDBE**

**Član 1.**

Ovim Pravilnikom u KJKP „Vodovod i kanalizacija“ d.o.o. Sarajevo organizuje se Služba za vodosnabdijevanje (u daljem tekstu:Služba), uređuje njena organizacija i sastav , nadležnost i upotreba Službe, način opremanja materijalno-tehničkim sredstvima i opremom (u daljem tekstu: MTS i oprema) i obučavanje pripadnika Službe.

**II – ORGANIZACIJA I SASTAV SLUŽBE**

**Član 2.**

U skladu sa članom 4. i članom 6. stav 6. Uredbe o organizovanju službi zaštite i spašavanja i jedinica civilne zaštite specijalizovane namjene Kantona Sarajevo (u daljem tekstu: Uredba), Služba se organizuje u KJKP „Vodovod i kanalizacija“ d.o.o. Sarajevo (u daljem tekstu:Preduzeće) sa sjedištem u Sarajevu, ulica Jaroslava Černija br.8.

**Član 3.**

Služba iz člana 2. ovog Pravilnika sastoji se od rukovodioca i zamjenika rukovodioca Službe i 18 pripadnika Službe raspoređenih u 3 ekipe. Sastav i kvalifikacionu strukturu Službe utvrdit će posebnom Odlukom direktora Preduzeća.

Služba se popunjava zaposlenicima Pogona „Vodovod“.

**Član 4.**

Direktor Preduzeća će donijeti pojedinačna rješenja o imenovanju rukovodioca i zamjenika rukovodioca Službe i pripadnika Službe u roku od osam dana od dana stupanja na snagu ovog Pravilnika.

Rješenje iz stava 1. ovog člana sadrži sljedeće podatke: ime i prezime, adresu stanovanja , kontakt telefon, zanimanje i naziv pozicije na koju se raspoređuje u okviru Službe.

## **Član 5.**

Rukovodilac Službe rukovodi Službom , organizira i obezbjeđuje obavljanje svih poslova iz nadležnosti Službe utvrđenih ovim Pravilnikom , a u fazi spašavanja obezbjeđuje provođenje naredbi Kantonalnog štaba civilne zaštite .  
Rukovodilac Službe za svoj rad i rad Službe odgovoran je direktoru Preduzeća.

## **III – NADLEŽNOST SLUŽBE**

### **Član 6.**

U skladu sa članom 6. stav 6 Uredbe, Služba je zadužena da vrši operativne mjere zaštite i spašavanja koje se odnose na snabdijevanje građana pitkom vodom na pogođenom području, kao i operativne mjere u fazi spašavanja i fazi otklanjanja određene članom 15. Pravilnika o organiziranju službi zaštite i spašavanja i jedinica civilne zaštite, njihovim poslovima i načinu rada .  
U tim slučajevima Služba vrši poslove utvrđene članom 7. i 8. ovog Pravilnika.

### **1. U fazi spašavanja – odnosno u fazi dok traje prirodna ili druga nesreća**

#### **Član 7.**

Tokom trajanja prirodne ili druge nesreće Služba mora biti stalno u mobilnom stanju i izvršavati sve poslove i zadatke iz svoje nadležnosti utvrđene ovim Pravilnikom na području Kantona koje naredi Kantonalna štab civilne zaštite, zavisno od prirodne ili druge nesreće koja se desi na određenom području , s tim da se po naredbi Kantonalnog štaba civilne zaštite može angažovati i na teritoriji Federacije , kada se za tim ukaže potreba.

Služba u fazi trajanja prirodne i druge nesreće vrši i slijedeće operativne mjere zaštite i spašavanja na pogođenom ili ugroženom području i to u fazi spašavanja :

- vrši opravku svih postojećih oštećenih i uništenih objekata vodosnabdijevanja i vodovodne mreže;
- postavlja pumpe za vodu i druge uređaje za eksploataciju podzemnih voda na za to predviđenim mjestima, kada ne funkcioniše redovni sistem vodosnabdijevanja;
- snabdijeva vodom stanovništvo putem cisterni ili na drugi način;
- vrši stalnu analizu postojećih izvora vode, kao i podzemnih voda koje se koriste za piće;
- obavještava stanovništvo o ispravnosti vode, planovima redukcije i načinu korištenja vode za piće u domaćinstvima i
- vrši druge mjere i postupke važne za snabdijevanje vodom i njenu upotrebu na pogođenom području

### **2. U fazi otklanjanja posljedica , odnosno nakon prestanka prirodne ili druge nesreće**

#### **Član 8.**

U fazi nakon prestanka prirodne ili druge nesreće , Služba sastavlja izvještaj o svojim aktivnostima u toku trajanja prirodne i druge nesreće.

Pored toga Služba u fazi otklanjanja posljedica vrši i slijedeće poslove i zadatke iz svoje nadležnosti :

-vrši angažiranje stručnih timova za rješavanje pitanja koja se odnose na vodosnabdijevanje;  
-osigurava uvjete za normalno snabdijevanje higijenski ispravnom vodom stanovništva na pogođenom području.

#### **Član 9.**

Naredba Kantonalnog štaba civilne zaštite dostavlja se direktoru Preduzeća koji naredbu odmah prosljeđuje rukovodiocu službe a koji je dužan pravovremeno obezbjediti djelovanje Službe za izvršenje zadatka utvrđenog u Naredbi.

#### **Član 10.**

Procedure o načinu djelovanja i postupcima Službe u slučaju nastanka prirodne ili druge nesreće donijet će direktor Preduzeća na prijedlog rukovodioca Službe.

### **IV - MTS I OPREMA POTREBNA ZA RAD SLUŽBE**

#### **Član 11.**

U cilju izvršavanja poslova i zadataka iz nadležnosti Službe, tokom trajanja prirodnih i drugih nesreća , sva MTS iz člana 12. Pravilnika , stavljaju se na raspolaganje Službi. Služba se oprema MTS, sa kojima raspolaže Preduzeće, te sa MTS opremom i vozilima koja se za potrebe Službe nabavljaju preko Kantonalnog štaba civilne zaštite kroz Program razvoja zaštite i spašavanja Kantona.

#### **Član 12.**

Materijalnu formaciju Službe utvrdit će direktor Preduzeća na prijedlog rukovodioca Službe iz člana 3. ovog Pravilnika.

Nabavka MTS i opreme vršit će se na osnovu godišnjih planova realizacije nabavke sredstava za potrebe službi zaštite i spašavanja Kantona.

### **V - OBUČAVANJE I OSPOSABLJAVANJE**

#### **Član 13.**

Pripadnici Službe su dužni da se obučavaju i osposobljavaju za izvršenja poslova i zadataka iz člana 6.ovog Pravilnika.

Obučavanje i osposobljavanje iz stava 1. ovog člana , pripadnika Službe , vrši se kroz redovno obučavanje koje organizuje Preduzeće, odnosno kroz učešće na seminarima i kursovima, te radionicama i vježbama koje se organizuju za ove namjene.

Pohađanje specijalističkih kurseva koje organizira Kantonalna uprava civilne zaštite i nadležni organi civilne zaštite i druge institucije Federacije i BiH provodit će se dogovaranjem sa Preduzećem i Kantonalnom upravom civilne zaštite.

## **VI – ZAVRŠNA ODREDBA**

### **Član 14.**

Ovaj Pravilnik stupa na snagu danom donošenja .

U Sarajevu, 13.11.2013. god.

Br : 03-02/13

v.d. Direktor

mr.sc. Busuladžić Hasija, dipl.ing.građ.